

Na osnovu člana 18. stav 1. tačka b) Ustava Kantona Sarajevo ("Službene novine Kantona Sarajevo", broj 1/96, 2/96, 3/96, 16/97, 14/00, 4/01 i 28/04), a u skladu sa članom 3. Zakona o javnim preduzećima u Federaciji Bosne i Hercegovine ("Službene novine Federacije BiH", broj 8/05), Odlukom o standardnoj klasifikaciji djelatnosti u Federaciji Bosne i Hercegovine ("Službene novine Federacije BiH", broj 28/98, 36/98 - Ispravka i 47/98 - Ispravka), Skupština Kantona Sarajevo, na sjednici od 10. novembra 2005. godine, donijela je

ODLUKU

O USKLADIVANJU STATUSA JAVNOG KOMUNALNOG PREDUZEĆA "GRADSKI SAOBRAĆAJ" SARAJEVO SA ZAKONOM O JAVNIM PREDUZEĆIMA U FEDERACIJI BOSNE I HERCEGOVINE

I - OSNOVNE ODREDBE

Član 1.

Ovom odlukom osnivač Kanton Sarajevo, ulica Reisa Džemaludina Čauševića broj 1. Sarajevo (u daljnjem tekstu: Osnivač), usklađuje oblik, firmu i način upravljanja u skladu sa Zakonom o javnim preduzećima u Federaciji Bosne i Hercegovine ("Službene novine Federacije BiH", broj 8/05) (u daljnjem tekstu: Zakon), utvrđuje visinu osnovnog kapitala i vrši usklađivanje djelatnosti Preduzeća u unutrašnjem prometu u skladu sa Odlukom o standardnoj klasifikaciji djelatnosti u Federaciji Bosne i Hercegovine i vrši upis prava obavljanja vanjskotrgovinskog poslovanja u skladu sa zakonom.

Član 2.

Preduzeće u skladu sa Zakonom mijenja oblik i djelovat će kao društvo sa ograničenom odgovornošću (u daljnjem tekstu: Preduzeće).

Član 3.

Preduzeće je pravni sljednik KANTONALNOG JAVNOG KOMUNALNOG PREDUZEĆA "GRADSKI SAOBRAĆAJ" SARAJEVO, registrovanog Rješenjem Višeg suda u Sarajevu broj UF/I-903/96 od 28.06.1996.godine, Rješenjem Kantonalnog suda broj UF/I-1970/98 od 11.12.1998.godine i Rješenjem Kantonalnog suda u Sarajevu broj UF/I-1232/02 od 28.08.2002.godine i ima svojstvo pravnog lica sa pravnim i poslovnim sposobnošću.

Član 4.

Preduzeće obavlja djelatnost imovinom koja mu je data na upravljanje, a koja je u cjelokupnom vlasništvu Osnivača.

II - FIRMA I SJEDIŠTE DRUŠTVA

Član 5.

Preduzeće će poslovati pod firmom: Kantonalno javno komunalno preduzeće "GRADSKI SAOBRAĆAJ" d.o.o. Sarajevo.

Skraćeni naziv: KJKP "GRAS" d.o.o. Sarajevo.

Član 6.

Sjedište Preduzeća je u Sarajevu u ulici Velikih drveta broj 1.

Član 7.

Preduzeće ima pečat okruglog oblika u kome je ispisan puni naziv firme i štambilj četvrtastog oblika, koji sadrži puni naziv firme, a služi za ovjeru prijema podnesaka (akata).

Vrsta pečata i štambilja, način upotrebe i čuvanje utvrđuje se općim aktom koji donosi Uprava Preduzeća.

III - DJELATNOST PREDUZEĆA

Član 8.

Preduzeće obavlja djelatnost i to:

- 60.212 prevoz putnika u gradskom i prigradskom saobraćaju, redovni (linijski)
- 60.2360.230 ostali prevoz putnika u drumskom saobraćaju
- 60.211 prevoz putnika u drumskom saobraćaju, redovni (linijski)
- 63.2163.210 ostale prateće djelatnosti u kopnenom saobraćaju
- 63.3063.300 djelatnost putničkih agencija i turopatora; ostale usluge turistima, d.n.
- 64.2064.200 telekomunikacije
- 22.2222.220 štampanje, d.n.
- 22.2322.230 knjigovezački i završni radovi
- 22.2422.240 pripreme i izrada štamparske forme
- 22.2522.250 ostale usluge u vezi sa štampanjem
- 45.212 niskogradnja
- 45.1145.110 rušenje građevinskih objekata i zemljani radovi
- 45.2345.230 izgradnja autoputeva i drugih saobraćajnica, aerodromskih pista i sportskih terena
- 50.2050.200 održavanje i popravak motornih vozila
- 50.302 trgovina na malo dijelovima i priborom za motorna vozila
- 50.303 posredništvo u trgovini dijelovima i priborom za motorna vozila
- 50.5050.500 trgovina na malo motornim gorivima i mazivima
- 52.2652.260 trgovina na malo duhanskim proizvodima
- 52.4752.470 trgovina na malo knjigama, novinama, časopisima, papirnatom robom i pisaćim priborom
- 52.2452.240 trgovina na malo hljebom, pecivom, kolačima, tjesteninama, bombonama i slatkišima
- 52.3352.330 trgovina na malo kozmetičkim i toaletnim proizvodima
- 52.4152.410 trgovina na malo tekstilom

- 52.484 trgovina na malo igrama i igračkama
- 52.487 ostala trgovina na malo u specijalizovanim prodavnicama
- 55.3055.300 restorani
- 55.5155.510 kantine (menze)
- 74.3074.300 tehničko ispitivanje i analiza
- 74.4074.400 reklama i propaganda
- 74.8474.840 ostale poslovne djelatnosti,d.n.
- 80.4180.410 vozačke škole

Član 9.

Djelatnost Preduzeća u vanjskotrgovinskom poslovanju glasi:

Vanjska trgovina na veliko neprehrambenim proizvodima u okviru registrovane djelatnosti i usluge u vanjskotrgovinskom prometu iz oblasti registrovane djelatnosti.

Član 10.

Preduzeće može obavljati poslove samo u okviru djelatnosti upisane u sudski registar.

Preduzeće može obavljati i druge poslove koji se uobičajeno obavljaju uz djelatnosti upisane u sudski registar, u obimu i na način koji su potrebni za poslovanje, a ne predstavljaju obavljanje tih poslova kao redovne djelatnosti.

IV - SREDSTVA ZA RAD I IMOVINA

Član 11.

Osnovni kapital Preduzeća čini novac, iskazan u novčanom iznosu od 10.000,00 KM, odnosno 100% udjela.

Osnovni iznos kapitala se ne može smanjivati ispod iznosa utvrđenog zakonom.

Osnivač može u toku poslovne godine povećati vrijednost osnovnog kapitala Preduzeća novim ulaganjem.

Član 12.

Povećanje i smanjenje osnovnog kapitala vrši se na osnovu odluke Osnivača.

Član 13.

Preduzeće može formirati fond rezervi za potrebe zaposlenih, a način i postupak njihovog formiranja kao i izdvajanje i korištenje sredstava utvrđuje se Statutom Preduzeća.

V - PRAVA, OBAVEZE I ODGOVORNOSTI U PRAVNOM PROMETU

Član 14.

Sredstva Preduzeća su u pravnom prometu.

Preduzeće u pravnom prometu zaključuje ugovore i vrši druge pravne poslove i radnje u okviru svoje pravne sposobnosti.

Član 15.

Preduzeće odgovara za svoje obaveze cjelokupnom imovinom Osnivača, koja mu je data na korištenje, osim dobara u općoj upotrebi.

Preduzeće odgovara i za obaveze drugih društava preuzete ugovorom.

Osnivač za obaveze Preduzeća odgovara do visine svog osnivačkog udjela u Preduzeću.

VI - ORGANI PREDUZEĆA

Član 16.

Organi Preduzeća su:

1. Skupština,
2. Nadzorni odbor,
3. Uprava, kao organi upravljanja,
4. Odbor za reviziju.

Član 17.

1. Skupština odlučuje o:

- donošenju Statuta Preduzeća i njegovim izmjenama i dopunama,
- raspodjeli godišnje dobiti i pokriću gubitka,
- povećanju i smanjenju osnovnog kapitala,
- osnivanju novih preduzeća,
- planu poslovanja, investiranju i trajnoj poslovnoj saradnji, odnosno povezivanju sa drugim preduzećima,
- etičkom kodeksu i Poslovniku Skupštine,
- imenovanju i razrješenju Nadzornog odbora i Odbora za reviziju,
- usvajanju godišnjeg izvještaja Preduzeća koji uključuje finansijski izvještaj i izvještaj revizora, Nadzornog odbora i Odbora za reviziju,
- promjeni oblika i podjeli Preduzeća,
- naknadama članovima Nadzornog odbora i Odbora za reviziju,
- ostalim pitanjima u skladu sa Zakonom o privrednim društvima i Zakonom o javnim preduzećima i Statutom Preduzeća.

Član 18.

2. Nadzorni odbor je nadležan da:

- nadzire rad Uprave,
- priprema i predlaže Etički kodeks, poslovničke i druge akte koje usvaja Skupština Preduzeća,
- imenuje i razrješava članove Uprave i predlaže kandidate za Odbor za reviziju u skladu sa Zakonom,
- razmatra i nadzire postupak javnih nabavki,
- predlaže raspodjelu profita, daje upute direktoru za provođenje mjera i aktivnosti prilikom uočenih propusta,

- odlučuje o ostalim pitanjima u skladu sa Zakonom o privrednim društvima i Zakonom o javnim preduzećima i Statutom Preduzeća.

Član 19.

Vršenje pojedinih poslova iz prethodnog člana Nadzorni odbor može povjeriti jednom od svojih članova, a predsjednik Nadzornog odbora je solidarno odgovoran sa članom Nadzornog odbora kojem je povjereno ovlaštenje.

Član 20.

Nadzorni odbor ima predsjednika i četiri (4) člana.

Prilikom imenovanja članova Nadzornog odbora, primjenjuju se odredbe Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", broj 12/03 i 34/03) i odredbe Zakona o sukobu interesa u institucijama vlasti Bosne i Hercegovine ("Službeni glasnik BiH" broj 13/02,16/02,14/03 i 12/04).

Predsjednik i članovi Nadzornog odbora imenuju se istovremeno na period od četiri godine. Za predsjednika i člana Nadzornog odbora ne mogu biti imenovana lica:

- osuđivana za krivična djela i za privredne prijestupe nespojive s dužnošću u Nadzornom odboru, pet godina od dana pravosnažnosti presude, isključujući vrijeme zatvorske kazne,
- kojima je presudom suda zabranjeno obavljanje aktivnosti u nadležnosti nadzornog odbora,
- starija od 70 godina na dan imenovanja.

Član 21.

Sjednica Nadzornog odbora održava se najmanje jednom u tri mjeseca.

Sjednicu Nadzornog odbora saziva predsjednik Nadzornog odbora.

Član 22.

Rad Nadzornog odbora će biti regulisan Poslovníkom o radu Nadzornog odbora.

Član 23.

3. Uprava

Uprava zastupa Preduzeće i vodi njegovo poslovanje.

Uprava je nadležna za izvještavanje Nadzornog odbora i provedbu Etičkog kodeksa, izradu i realizaciju planova poslovanja i postupka nabavke, te predlaganje raspodjele profita, prijem zaposlenika i regulisanje njihovog radnog pravnog statusa.

Funkciju Uprave vrši direktor Preduzeća i izvršni direktori Preduzeća.

Upravu bira Nadzorni odbor većinom glasova na osnovu javnog konkursa iz reda kandidata, koji najbolje odgovaraju za obavljanje poslova, a ne mogu imati funkciju u političkim strankama.

Direktor može vršenje neposrednog nadzora iz nadležnosti Uprave povjeriti izvršnom direktoru, ali dalje ostaje solidarno odgovoran sa izvršnim direktorom za izvršavanje propisanog posla.

Član 24.

Direktor predsjedava Upravom, rukovodi poslovanjem, zastupa i predstavlja Preduzeće i odgovara za zakonitost poslovanja.

Član 25.

Direktor Preduzeća je ovlašten da u ime Preduzeća zaključuje ugovore i vrši druge pravne poslove i radnje, kao i da društvo zastupa pred sudom i drugim organima.

Direktor Preduzeća podnosi prijavu za upis u sudski registar i preduzima sve druge radnje vezane za registraciju Preduzeća.

Član 26.

Direktor Preduzeća može putem prokure prenijeti ovlaštenje na druga lica u Preduzeću ili van njega u skladu sa Zakonom o privrednim društvima.

Član 27.

Direktor Preduzeća organizuje i rukovodi procesom rada i vodi poslovanje Preduzeća, samostalno donosi odluke, zastupa Preduzeće u odnosima sa trećim licima i odgovoran je za zakonitost rada Preduzeća Osnivaču.

Član 28.

Izvršni direktori organizuju rad, zastupaju i predstavljaju Preduzeće i odgovaraju za zakonitost poslovanja u obimu koje im odredi direktor, a što se utvrđuje posebnim rješenjem koje donosi direktor Preduzeća.

Član 29.

Direktor Preduzeća prof.dr. Ibrahim Jusufrić, nastanjen u Sarajevu u ul. Ivana Gorana Kovačića broj 2 zastupa i predstavlja društvo u unutrašnjem i vanjskotrgovinskom prometu, bez ograničenja, do raspisivanja konkursa i imenovanja.

Član 30.

4. Odbor za reviziju

Odbor za reviziju dužan je da:

- vrši reviziju finansijskog poslovanja Preduzeća i o utvrđenom stanju u roku od osam dana od dana okončane revizije dostavi izvještaj Skupštini i Nadzornom odboru Preduzeća,
- imenuje vanjskog revizora i direktora odjela za internu reviziju,
- razmotri godišnju studiju rizika i plan revizije, te osigurava da prijavljena pitanja budu bez odlaganja i na odgovarajući način otklonjena,
- osigura uslove Odjelu za internu reviziju da izvrši svoj posao u skladu sa planom revizije i izvršava svoje obaveze u skladu sa važećim standardima,
- preduzima mjere da interna kontrola u javnom preduzeću bude adekvatna i efikasna,
- podnosi mjesečne izvještaje Nadzornom odboru Preduzeća o radu i preduzetim mjerama.

Odbor za reviziju je dužan svoje nadležnosti vršiti u skladu sa odredbama Zakona o javnim preduzećima i Zakonom o privrednim društvima.

VII - UNUTRAŠNJA ORGANIZACIJA PREDUZEĆA

Član 31.

Preduzeće posluje kao jedinstveni pravni subjekt, a može imati i svoje podružnice koje će u pravnom prometu istupati u ime i za račun Preduzeća u granicama ovlaštenja koje dobije od Osnivača.

Unutrašnja organizacija Preduzeća utvrdit će se Statutom Preduzeća.

VIII - USLOVI ZA OBAVLJANJE VANJSKOTRGOVINSKE DJELATNOSTI

Član 32.

Preduzeće vanjskotrgovinsku djelatnost obavlja u skladu sa važećim odredbama zakona, pridržavajući se dobrih poslovnih običaja i poslovnog morala sa pažnjom dobrog privrednika.

Preduzeće je posebno dužno da u spoljnotrgovinskom poslovanju vodi računa o zaštiti ugleda i interesa Bosne i Hercegovine.

IX - PRAVA I OBAVEZE OSNIVAČA I ZAPOSLENIH RADNIKA

Član 33.

Preduzećem upravlja Skupština.

Prava i obaveze Skupštine Preduzeća, u ime Osnivača, vrši Vlada Kantona Sarajevo.

Zaposlenici ostvaruju prava u skladu sa važećim zakonskim propisima, kolektivnim ugovorima i aktima Preduzeća.

Ugovorom o radu uredit će se prava, obaveze i odgovornosti zaposlenika Preduzeća u skladu sa važećim zakonima, kolektivnim ugovorom i aktima Preduzeća.

X - PLANIRANJE POSLOVANJA I RAZVOJA I POSLOVNE KNJIGE PREDUZEĆA

Član 34.

Preduzeće planira svoje poslovanje i razvoj i odlučuje o vršenju, vrsti i sadržini planova poslovanja i razvoja Preduzeća.

Preduzeće planiranje poslovanja i razvoja prilagođava ciljevima radi kojih je osnovano i uslovima djelovanja zakonitosti tržišta.

Član 35.

Preduzeće donosi trogodišnje planove poslovanja.

Preduzeće će usaglašavati trogodišnji plan poslovanja sa kretanjima uslova poslovanja, odnosno vršiti revidiranje trogodišnjeg plana na godišnjem nivou.

Član 36.

O radu i poslovanju Preduzeća vode se poslovne knjige saglasno zakonima. Preduzeće je dužno za svaku poslovnu godinu, u skladu sa važećim zakonskim propisima, sastaviti periodični obračun i završni račun.

XI - UTVRĐIVANJE I RASPOREĐIVANJE DOBITI

Član 37.

Utvrđivanje prihoda, rashoda i rezultata poslovanja vrši se polugodišnjim i godišnjim obračunom u skladu sa zakonom.

Član 38.

Dobit koja ostaje Preduzeću predstavlja neto (čistu) dobit. Neto dobit je finansijski rezultat poslovanja Preduzeća u toku poslovne godine, koja se dobije poslije odbitka svih troškova poslovanja i svih davanja po osnovu doprinosa, poreza i drugih finansijskih tereta.

Član 39.

Osnivač na kraju poslovne godine odlučuje o raspodjeli dobiti.

Član 40.

Ako Preduzeće u poslovanju po završnom računu iskaže gubitak, taj gubitak će se prvenstveno pokriti iz sredstava Preduzeća, koja se u skladu sa propisima mogu koristiti za pokrivanje gubitka. Ukoliko se gubitak ne može pokriti iz sredstava Preduzeća pokreće se postupak u skladu sa zakonom.

XII - OPĆI AKTI PREDUZEĆA

Član 41.

Opći akti Preduzeća su Statut i drugi akti kojima se na opći način regulišu odnosi u Preduzeću.

Preduzeće je obavezno da, u roku od 60 dana od donošenja ove odluke, donese Statut i druga akta Preduzeća.

XIII - TRAJANJE I PRESTANAK PREDUZEĆA

Član 42.

Preduzeće je osnovano na neodređeno vrijeme i traje dok postoje ekonomski i zakonski uslovi za njegovo postojanje.

Preduzeće prestaje:

- odlukom Osnivača, i
- u slučajevima predviđenim zakonom.

XIV - NAČIN IZMIRENJA TROŠKOVA USKLAĐIVANJA PREDUZEĆA I POSLJEDICE NEUSPJELOG USKLAĐIVANJA

Član 43.

Troškove usklađivanja statusa Preduzeća snosi Preduzeće.

XV - PRELAZNE I ZAVRŠNE ODREDBE

Član 44.

Na pitanja koja nisu regulisana odredbama ove odluke shodno se primjenjuju odredbe Zakona o javnim preduzećima u Federaciji Bosne i Hercegovine i Zakona o privrednim društvima i Zakona o ravnopravnosti spolova u Bosni i Hercegovini.

Sve funkcije navedene u organima preduzeća odnose se na oba spola.

Skupština Kantona Sarajevo će u roku od 6 (šest) mjeseci od dana stupanja na snagu ove odluke odrediti koja prirodna bogatstva i dobra od općeg interesa i sredstva kojima posluje javno preduzeće su u državnom vlasništvu, odnosno vlasništvo Kantona Sarajevo.

Vrijednost i vlasnička struktura kapitala u KJKP "Gras" Sarajevo sa stanjem 31.12.2005. godine, utvrdit će se u roku od 12 (dvanaest) mjeseci od dana stupanja na snagu ove odluke.

Član 45.

Stupanjem na snagu ove odluke prestaje primjena Odluke o organizovanju JKP "Gradski saobraćaj" Sarajevo ("Službene novine Grada Sarajeva", broj 8/93), Odluke o preuzimanju prava osnivača Javnog komunalnog preduzeća "Gradski saobraćaj" Sarajevo ("Službene novine Kantona Sarajevo", broj 11/97), Odluke o izmjenama i dopunama Odluke o osnivanju JKP "Gradski saobraćaj" Sarajevo broj 01-023-111/98 od 16.07.1998. godine i Odluke o dopunama Odluke o osnivanju JKP "Gradski saobraćaj" Sarajevo broj 01. 27-188/01 od 10.05.2001. godine.

Član 46.

Ova odluka stupa na snagu danom objavljivanja u "Službe- nim novinama Kantona Sarajevo".

Broj 01-05-30033/05
10. novembra 2005. godine
Sarajevo

Predsjedavajuća
Skupštine Kantona Sarajevo
Meliha Alić, s. r.